



## Program Setahun MADANI platform rakyat saksikan inisiatif, pencapaian kerajaan - Fahmi

Oleh Tuty Haryanti Ahmad Rodzi - Disember 5, 2023 @ 11:10am  
bhnews@bh.com.my

KUALA LUMPUR: Program Setahun Bersama Kerajaan MADANI bermula 8 hingga 10 Disember ini akan menjadi platform terbaik untuk rakyat menyaksikan dan memahami segala pelaksanaan dasar, inisiatif serta pencapaian Kerajaan Perpaduan sepanjang tempoh setahun pentadbiran.

Menteri Komunikasi dan Digital, Fahmi Fadzil, berkata program selama tiga hari yang dijadualkan berlangsung di pekarangan Stadium Nasional Bukit Jalil itu bakal menawarkan informasi terbabit secara terus kepada rakyat melalui reruai pelbagai kementerian.

Selain itu, katanya, aktiviti seperti pameran, bayaran saman trafik melalui kaunter disediakan, dan Jualan Mega MADANI serta Jualan RAHMAH turut diadakan.

Beliau berkata, dijangkakan antara 100,000 hingga 200,000 pengunjung menghadiri program itu yang juga menawarkan pengisian mengenai Identiti Digital Nasional atau Digital ID, termasuk berhubung aspek pendaftaran.

"Ini bukan sambutan pesta tetapi lebih kepada hari bersama pelanggan, dan orang ramai dijemput datang nanti.

"Ia adalah satu peluang baik untuk rakyat datang melihat, mendengar, menyaksikan, alami, membeli dan sama-sama memahami apa yang telah diusahakan (oleh kerajaan)," katanya ketika menjadi tetamu program Apa Khabar Malaysia: Setahun Bersama Kerajaan MADANI yang disiarkan secara langsung melalui saluran Bernama TV, hari ini.

Dalam tempoh setahun pertama pentadbiran, Fahmi berkata, Kerajaan MADANI secara amnya telah berjaya mengukuhkan kestabilan politik yang merupakan asas sangat penting apabila tiada berlaku perubahan kerajaan.

Malah, katanya, kerajaan telah mengumumkan beberapa dasar seperti Ekonomi MADANI, Pelan Induk Perindustrian Baru (NIMP 2030), peralihan kepada tenaga hijau dan terbaru Kertas Putih Cadangan Dasar Gaji Progresif.

"Sebenarnya dengan mengekalkan kerajaan, ia akan menunjukkan kestabilan politik. Maka, pelabur yakin ringgit semakin kukuh," katanya.

Bagi tahun kedua pemerintahan pula, beliau berkata, Kerajaan MADANI akan memberi tumpuan kepada peningkatan pendapatan rakyat.

"Sama ada ekonomi digital ataupun bagi sektor awam dan swasta, ekonomi akan semakin pulih dan gaji dijangka naik pada 2024," katanya.

Dalam pada itu, Fahmi berkata, program Saya Digital yang akan turut diadakan di lokasi berkenaan adalah penting untuk memberi kefahaman atau literasi digital kepada orang ramai.

"Sebagai contoh jika menggunakan Internet, apa yang perlu kita lakukan untuk menyelamatkan data kita, terutama apabila mengisi borang, bagaimana hendak tahu data kita pergi ke mana... perkara asas seperti data peribadi ini sangat penting.

"Oleh itu, kerajaan memutuskan untuk semua perkhidmatan kerajaan nanti akan menggunakan Digital ID dengan ada satu kata laluan saja tetapi identiti disahkan melalui Jabatan Pendaftaran Negara (JPN), kepada semua aplikasi yang dibangunkan kerajaan dan swasta," katanya.

Majlis perasmian penutupan Program Setahun Bersama Kerajaan MADANI bakal disempurnakan oleh Perdana Menteri, Datuk Seri Anwar Ibrahim, pada 10 Disember ini dengan turut dihadiri kepimpinan tertinggi kerajaan.